

Arraunketa

Jaberik gabeko txapela

Erabakitzeke dago Orio edo San Pedro den aurtengo Gipuzkoako txapelduna

Ramon Basaldua / Bilbo

GIPUZKOAKO ARRAUNKETA FEDERAZIOAK ez daki nori eman aurtengo Gipuzkoako Txapelketako Ikurrina. Getarian jokaturako estropadak lehen bi postuak bertan behera uztea erabaki ondoren, auzia ez da argitu hurrengo bi estropadetan: San Pedro eta Orio ez ziren batera aritu Euskadiko Txapelketan eta Orio sailkapeneko azken postura bidali zuten epaileek Zarauzko Ikurrinaren lehen jardunaldian Koxtaperen kalean sartu izanagatik. Federazioak proposamena egin die bi taldeei: txapela hurrengo estropada batean erabakitzea. Hala ere, Orioko Arraun Elkartek eta Sanpedrotarra Arraun Elkartek iritzi kontrajarriak dituzte.

Jose Julian Olasagasti Orioko presidentea haserre azaldu da gertatutakoarekin. «Hasteko, gure ustez Getarian jokaturiko Gipuzkoako Txapelketa ez zen bertan behera utzi behar. Aurreko estropada batzuetan gertatu dira horrelako gauzak, baina sekula ez dute horrelako erabakirik hartu». Oriotarren ordezkariaren aburuz, San Pedrok argi erakutsi zuen Euskadiko Txapelketan ez zuela Gipuzkoako txapeldun izateko aukerarik, finaletik at geratu baitzen kanporaketetan. «Hartutako erabakiarekin ados egon ez arren, prest azaldu ginen Gipuzkoako txapela Euskadiko Txapelketan erabakitzeke. San Pedro kanporatuta geratu zen aurreko egunean eta sailkatzen ez bada ez dugu uste txapeldun izateko aukerarik duenik. Txapeldun gu garela uste dut. Horretaz gain, Zarautzen gertatutakoaren ondoren azken postura bidali gintuzten. Getarian, berriz, aurreneko bi postuak baino ez zituzten kontuan hartu».

Olasagastiren iritziz, «lotsagarria» izango litzateke Gipuzkoako txapela San Pedrori ematea Zarauzko Ikurrinaren lehen jardunaldian gertatutakoa aprobe-

Bi aste igaro dira Gipuzkoako Txapelketa jokatu zenetik eta oraindik zehaztu barik dago Orio edo San Pedrorentzat izan den garaipena. Gipuzkoako Federazioak proposamena egin die bi taldeei: auzia batera aritzen diren hurrengo estropadan erabakitzea. Pasaitarrak ez daude irtenbide horren alde, eta litekeena da eurentzat izatea txapela.



San Pedrokoen ustez beraientzat izan beharko luke Gipuzkoako txapelak.

ANDER GILLENENA

Jose Julian Olasagasti:

«Lotsagarria izango litzateke Gipuzkoako txapela San Pedrori ematea Zarautzen gertatutakoa aprobe-»

Jose Manuel Santos:

«Araudiaren arabera gauzak nola dauden kontuan izanik txapelduna San Pedro dela esan zigun federazioak».

txatuz. «Koxtaperekin izan genuen arazoa Zarautzen, eta ez San Pedrorrekin, hogeitasegundora sartu baitzen. Hori kontuan hartu beharra dago. Hamabi traine-ruak hartu dituzte kontuan erabakia hartzeko, eta Getarian, berriz, aurreneko biak».

Pasai San Pedroko ordezkariak

ere argi dituzte gauzak. Haien ustez, Federazioko arduradunek asmatu egin zuten Getarian jokaturako Gipuzkoako Txapelketa bertan behera uztea erabaki zutenean. Jose Manuel Santos presidenteak dioenez, «Federazioak erabaki bat hartu zuen orduan, hau da, Euskadiko Txa-

pelketan edo Zarauzko Ikurrinaren lehen egunean jokatu zela Gipuzkoako txapela. Euskadikoan ez ginen batera aritu eta Zarautzen Orio sailkapeneko azken postuan jarri zuten. Araudiaren arabera gauzak nola dauden galdetu genion Federazioari, eta Getarian hartutako erabakia kontuan harturik txapelduna San Pedro dela esan zigun. Gure aldetik guztia dago esanda».

Beste alde batetik, *El Diario Vasco* egunkariak antolatzen duen estropada aurkeztu zuten atzo. Orion jokatu da datorren larunbatean eta honako hamar unti hauek ariko dira nor baino nor: Orio, San Pedro, Donibane-ko, Koxtape, Trintxerpe, Hondarribia, Getaria, Zarautz, Ondarroat eta Zierbena. X

Saskibaloia

Taugresek bide onean dela erakutsi du

Bozidar Maljkovicek, Parisko Racingeko entrenatzaileak, «oso talde orekatutzat» jo du Baskonia

Luis Karlos Garcia / Gasteiz

GANORAZ dabilela erakutsi du Taugres-Baskoniak denboraldi-aurre hasiera gogor honetan. Herenegun, Mendizorrotza kiroldegian, Bozidar Maljkovicen Parisko Racing talde indartsuarekin 85-84 irabazi zion, partidua polit batean. Horrela, mendekua hartu zuen, Sergio Scarioloren taldeak frantziarren aurka galdu baitzuen (74-66) joan zen astean Hendaiaiko neurketan. Taugresek FC Barcelonaren kontra hasi

zuen denboraldi-aurrea eta garaipena lortu zuen (85-84).

Defentsa bizia eta jokaera adoretatsua izan ziren Taugresen ezaugarri nabarmenenak iragan igande arratsaldean Gasteizen jokaturako partiduan. Parisko Racing taldeko entrenatzaile Bozidar Maljkovicen ustez, Baskonia «oso talde orekatua» da. Tekniko serbiarrak esan zuen Taugresek «menpekotasun handia» izango duela Tony Smithekin. Base estatu batuarra oraindik ez dagoela sasoian ohartarazi

zuen, baina edozelan ere jokalaria bikaina dela esan zuen.

Smith ez zen onena izan herenegun, ordea. Ez zuen asmatu erasoan eta Brent Scott izan zen onena, 17 punturekin. Anthony Bowie, berriz, joko kaskarrean egin zutenetako bat izan zen eta hobetu egin beharko du, Baskoniak nahi duen puntako hegala izan nahi badu. Oraingoz, Lucio Angulo zaragozarrak Bowie baino hobeto dagoela erakutsi du.

Gaur eta bihar entrenatuko da Scarioloren taldea, eta etzi goize-

ko prestakizun saioaren ondotik, Torrelavegara joango da, Miguel Reyesen Caja Cantabriaren kontra jokatu behar baitu ostegun arratsaldean. Bi egun geroago, berriz, euskal zaleen aurrean ariko da berriro: Joventuten aurka jokatu du Bilbon.

Taugres-Joventut partidua ikusteko sarrerak salgai daude Bilbon eta Gasteizen. Saski Baskoniak jakinarazi du Dendaraan duen dendan erostea dagoela goizean eta arratsaldean. Bos-tehun pezetako sarrerak dira. X

Golfa

Davis Lovek lortu du New Yorken jokaturako PGA

Azken jardunaldian bost kolpeko alde atera zion Justin Leonard herikideari

Agentziak / New York

DAVIS LOVE estatu batuarak irabazi du New Yorken jokaturako PGA, aurtengo Grand Slameko azken torneo. Lovek 66 kolpe (lau kolpe parraren azpitik) egin zituen azken jardunaldian, eta txapelketa 269 kolperekin (11 kolpe parraren azpitik) amaitu zuen. Garaipena azken jardunaldi horretan erabaki zen. Davis Love eta Justin Leonardek berdinduta ekin zioten azken ibilbideari. Aurkariak zazpi kolpera zeuden ordurako, beraz argi zegoen bietako batek irabaziko zuela.

Lovek lehenengo zulotik erakutsi zuen garaipena eskuratzeko irrikitan zegoela, eta oso joko seguruarekin, aldeak irekitzen hasi zen. Ibilbidearen erdialdean, jadanik bost kolperen alde zegoen Love eta Leonard artean. Leonard oso gaizki ari zen drive-arekin, eta horrela txapelketa irabazteko aukera guztiak galdu zituen. Ibilbidearen bigarren zatian saiatu zen erreakzionatzen, baina inoiz ez zuen alde hiru kolpe baino gutxiagor murriztu. Davis Lovek, bere aldetik, edeki aprobe-txatu zuen aurkariak emandako abantaila, eta, arrisku gehiegirik hartu gabe, titulua bereganatu ahal izan zuen.

Hau da, hain zuzen ere, Davis Lovek bere karreraren esku-ratzen duen Grand Slameko lehenengo torneo. Saria jasotzerakoan, negar malkoak ere ateratu zitzaizkion, denbora asko baitzeraman horrelako garaipen baten atzetik. «Joko ona egiteko asmoarekin iritsi nintzen torneo. Gogor lan egin nuen lehenengo jardunaldietan konfiantza hartzeko, eta gauzak ondo ateratu ziren. *Swing*-arekin konfiantza mantendu eta jokoan gora-beherarik ez edukitzea zen nire helburua. Erritmoari azken momentura arte eutsi diot, eta azkenean Grand Slameko torneo bat irabazteko ametsa bete ahal izan dut».

Tiger Woods oso kaskar bukaeran

Tiger Woods faborito nagusiak oso ibilbide kaskarrekin amaitu zuen PGA torneo. Azken ibilbidea egiteko 75 kolpe (bost kolpe parraren gainetik) behar izan zituen, eta torneo 286 kolperekin amaitu zuen, hau da, Davis Love garaileak baino 17 kolpe gehiago behar izan zituen PGA torneoan. John Daly lehen eguneko liderrak ere 286 kolperekin amaitu zuen, eta Ernie Els hegoafrikarrak 290ekin. X